



TEZAU LITURGIC

3 OCTOMBRIE

**SLUJBA
SF. IERARH-
MĂRTURISITOR
AGATANGHEL
PREOBRAJENSKI,
MITROPOLITUL
IAROSLAVULUI**



MOSCOVA, 2000



Месяца октоврия в 3-й день Иже во святых отца нашего Агафангела исповедника, митрополита Ярославского

НА ВЕЛИЦЕЙ ВЕЧЕРНИ

На Господи, возвах: стихиры, глас 8.

Подобен: О преславного чудесе:

Святителю отче Агафангеле, / ты от утробы
матерния / на служение Господу избран быв, / в
день Воздвижения / Животворящаго Креста
Господня родися / и крест свой взем, усердно
Христу последовал еси, / души своея
отвергнувся Его ради, // темже соблюл еси ю в
живот вечный.

Святителю отче Агафангеле, / ты яко дуга
радостотворная явился еси, / от востока до
запада / землю Русскую озаряя / молитвами
слезными и трудами Богоугодными, /
проповеданием Слова Божия, милосердием и
смирением, / и яко сотворивый и научивый //
велий в Царствии Небесном нареклся еси.

Святителю отче Агафангеле, / страдания, яко
уголь горящ от олтаря Господня, / очистиша
богоглаголивая твоя уста, / темже предания
церковная попирающая твердо обличал еси, /

разумея в последняя их, / како погибоша за
беззаконие свое, / и яко соние востающего //
Господь в Церкви Русской образ их уничижил
есть.

Святителю отче Агафангеле, / Христово был еси
благоухание, / воню разума Его являя в земли
Русской, / дело творя благовестника / и
злостражда, яко добр воин Христов, / имене Его
ради заточения и изгнания, поношения и
болезни терпя, // уповая, яко труд твой несть
тощ пред Господем.

Слава, глас тойже:

Егда Православная Церковь Русская /
богоборческими гонении люте обуревавшаяся, /
святитель Агафангел страж неусыпный тоя
явился, / по вся дни произволением умирая за
Христа, / темже жизнь вечную наследова, /
мощи своя граду Ярославлю во утверждение
даровав, / и ныне в сонме новомученик
Российских на Небесех ликует, // тепле моляся о
душах наших.

И ныне, догматик: Царь Небесный:

Вход. Прокимен дне.

Чтения три исповеднику:

Премудрости Соломоновы чтение:

Похваляему праведнику:

Премудрости Соломоновы чтение:

Праведницы во веки живут:

Премудрости Соломоновы чтение:

Праведник, аще постигнет скончаться:

На литии стихира храма и святого стихиры,
глас 1:

Таков нам подобаше архиерей, / преподобен,
незлюбив, / домоправитель верный и мудрый
дома Божия, / пастырь добрый, / душу свою за
овцы Христовы полагающий, / иже не убоясь
убивающих тело, / души же не могущих убить, /
яков ты явился еси, святителю Агафангеле, //
образ себе самого верным чадом Церкви Русския
подавая.

Супружницы и сына во единочасии лишився, /
Божие посещение уразумел еси, святителю
Агафангеле, / и призвание на путь монашеский,
/ таже и дар слова от Господа восприяв, /
сторицею той проповеданием и учением
преумножил еси / и светильник целомудрия
елеем милости просветив, // с мудрыми девами
в Чертог Небесный вшел еси.

Слава, глас 6.

Подобен: Все отложше:

Стойте и держите / предания церковная, — /
неленостно поучал еси паству, / святителю
Агафангеле, / егда же в Ярославскую обитель
Спасову / безбожными заключен был еси, /
вернии людие на криле церковнем собирашася,
/ да поне издавеча / видением лика твоего
утешатся, / темже и ныне предстани в помощь
нам, // празднующим любовью святую память
твою.

И ныне, Богородичен, глас и подобен тойже:
Возвеличим Тя вси, / Пренепорочную / Матерь
Бога нашего, / Юже освяти Дух Пресвятый. /
Ты бо еси, Богородице, / оружие наше и стена /
и Святой Руси Заступнице, / к Тебе ныне
прибегаем, / Тя на молитву призываем, / да
избавиши нас // от врагов наших.

На стиховне стихиры, глас 2:

Приидите, празднoлюбцы, / воспоим святителя
Агафангела достоблаженного, / учителей печать
и страдальцев единомравна, / Христа ради вся
во уметы вменившего, / велелепием
исповедания Церковь Русскую украсившего, //
ныне же посреде Церкви преподобных Бога
воспевающего.

Стих: Ты иерей во век / по чину Мелхиседекову.

Приидите, архиереи и священницы, / святителя
Господня песньми почтим, / той бо Жертве
Безкровней исповеданием уподобися, / еяже
приносити издетска слезно возжелe / во
умилование за грехи почивших в вере, // в
памяти смертной поучаяся.

Стих: Исповемся Тебе, Господи / всем сердцем
моим

Приидите, любострадальцы, / прославим
Агафангела освященного, / страсти по Христе
возлюбившаго, / тако во исповедании Лице Его
предварявшаго: / яко аз на раны готов Тебе
ради и аще бы восхотел еси жертвы, // дал бых
убо, Господи.

Слава, глас 6:

Возлюбил еси Бога паче живота / и ближняго
своего, яко себе, / во главу угла благо Церкви
Святей поставляя, / предания святых отец
неизменно хранить повелевая, / сквозе огонь и
воду страданий по Христе прошел еси / и ныне
вечнаго покоя наслаждаешься, // святителю
Агафангеле, отче наш.

И ныне, Богородичен: Творец и Избавитель:

На благословении хлебов тропарь, глас 2:
По вся дни умерщвляем был еси Бога ради, /
святителю и исповедниче Христов Агафангеле, /
во время безбожных гонений лютых / попечение

о Церкви Русской от Святейшаго Патриарха
Тихона прияв, / коварныя козни слуг диавола
разорил еси / и корабль Церковный мудре
управил еси / силою возлюбившаго тя Господа,
// Егоже моли даровати нам мир и велию
милость.

НА УТРЕНИ

На Бог Господь: тропарь тойже.

По 1-м стихословии седален, глас 7:

Приимше вся оружия Божия, / во плоти ходяще,
не по плоти воинствовал еси / и благодатию
Божиею устоял еси во время гонений лютых на
Церковь Русскую, / святителю отче Агафангеле,
/ покры бо ты в тайне Лица Своего Господь, //
Егоже моли помиловати нас в День Судный.

Слава, и ныне, Богородичен:

Предстательнице теплая и Заступнице христиан
еси, Богородице Всепетая, / темже со святыми
всеми земли Русския / Сына Твоего и Бога моли
// обрести нам велию милость.

По 2-м стихословии седален, глас 2:

В грозное время брани и смуты / воинов
Российских во имя Христова призвал еси /
верно Отечеству служить, / веру православную
незыблемо хранить / и живот свой полагати за

други своя, / святителю Христов Агафангеле, // сам же молитвою сугубою за тех подвижался еси.

Слава, и ныне, Богородичен:

Воистинну Богородицу Тя исповедуем,
Владычице, / ибо Бога неизреченно родила еси,
разоршаго Крестом смерть / и к Себе
привлекшаго святых соборы, // с нимиже моли
Его спасти землю Русскую, яко та есть Дом Твой.

Величание:

Величаем тя, святителю отче Агафангеле, / и
чтим за исповедание Христово страдания твоя,
// яже во утверждение на Руси Православия
претерпел еси.

Псалом избранный:

1 лик. Священницы Твои облекутся правдою, и
преподобнии Твои возрадуются. (Пс. 131:9)

2 лик. Повем имя Твое братии моей, посреде
Церкве воспою Тя. (Пс. 21:23)

1. Приидите, чада, послушайте мене, страху
Господню научу вас. (Пс. 33:12)

2. Возненавидех церковь лукавнующих, и с
нечестивыми не сяду. (Пс. 26:5)

1. Яко ревность дому Твоего снеде мя, и
поношения поносящих Ти нападоша на мя. (Пс.
68:15)

2. За слова устен Твоих аз сохраних пути

жестоки. (Пс. 6:4)

1. Искусил мя еси, и не обретеса во мне неправда. (Пс. 16:3)

2. Правдою Твоею избави мя и изми мя. (Пс. 30:2)

1. Погна враг душу мою, посадил мя есть в темных. (Пс. 142:3)

2. Изведи из темницы душу мою, исповедатися имени Твоему. (Пс. 141:38)

1. Бог мой еси Ты, и исповемся Тебе всем сердцем моим. (Пс. 127:28; 137:1)

2. Глаголах о свидениях Твоих пред цари, и не стыдяхся. (Пс. 118:146)

1. Благо есть исповедатися Господеви и пети имени Твоему, Вышний. (Пс. 91:2)

2. Пойте Господеви, преподобнии Его, и исповедайте память святыни Его, во всех людех чудеса Его. (Пс. 29:5; 95:3)

По полиелеи седален, глас 2:

Отверзошася ти врата правды, / и ныне вшед в
ня Господеви исповедуешися, / хвалу Ему в
церкви преподобных возсылая, / и кадило
молитв священных Престолу Его вознося, /
темже помяни чада Церкви Русския, любовию
чтуция тя, // святителю Агафангеле всехвальне.

Слава, и ныне, Богородичен:

Не имамы иныя надежды во обстояниих, / разве
предстательства Богоматере, / верных поучал
еси, святителю Агафангеле, / к Толгскому
чудотворному образу Ея притекая, / о спасении
Руси усердно Пречистую молил еси.

Степенна 1-й антифон 4-го гласа.

Прокимен, глас 4: Честна пред Господом:

Стих: Что воздам Господеви:

Евангелие от Луки, зачало 64.

По 50-м псалме стихира, глас 6:

Прием силу, нашедшу Святому Духу на тя, /
святителю Агафангеле, / во время безбожных
гонений в земле Русской / духом непоколебим
явился еси, / старец сый телом немощный и
притрудный, / заточения, изгнания и болезни, /
глад и мраз претерпевая, яко воистинну
свидетель Христов, // Егоже моли помиловати
души наша.

Канон, глас 8. егоже краегранесие:

Претерпевый до конца, той спасен будет.

Песнь 1.

Ирмос: Колесницегонителя фараоня:

Приими пение от души, благих вдовствующей, /
яко лепту, святителю Агафангеле, / положивый

в сокровищницу Церкви Русския / плод устен,
исповедающих имя Божие.

Ревностию по Бозе / море неверия и зловерия от
земли Русской вспять обратил еси, / и ныне
твоих подвиг море проходя, / держим
исповедание упования неуклонное, /
воспевающе и поюще в сердцах наших
Господеви.

Егда дадеша ти благодать / не точию во Христа
православно веровати, но и по Нем страдати, /
немокренно мук пучину прошел еси, / верным
сыном Русским образ быв, / и во исповедании
вниде во врата Небесная.

Богородичен: Твоего чрева благословен Плод,
Богоневесто, / Имже земнии вси от клятвы
избавихомся, / Благословенная, Пречистая,
несказанное чудо, недоразумеваемое ведение, /
всех верных спасение.

Песнь 3.

Ирмос: Утверждаей на камени веры:

Егда восташа отступницы на святыни земли
Русския, / тогда ты учае неложно, Богомудре
Агафангеле, / како подобает в Дому Божии
жити, / яже есть Церковь Бога Жива, / столп и
утверждение истины.

Реша безумнии: несть Бог, / приидите и
отставим вся праздники Божия от земли

Русския, / ты же глагола еси, блаженне
Агафангеле: / единением во святой вере и
братском мире утверждайтесь.

Повелевал еси верным апостольски, Агафангеле
Богодухновенне, / отлучатися от всякаго брата,
безчинно ходяща, а не по преданию, / в
научения странна и различна не прилагатися, /
но благодатию утверждати сердца.

Богородичен: Едина словом плотию Слово
рождшая, Чистая, / молимся, избави сетей
вражиих души наша, / и утверди на камени
Божественных хотений, / яко на Тя упование
возложихом.

Седален, глас 4:

Взирая на Начальника и совершителя веры
Иисуса, / верою возмогше от немощи, правду
соделал еси, святителю Агафангеле, / в
темницах и изгнаниях терпеливодушно
пребывая, / беды от гонителей, беды от
лжебратии терпя, / темже жизнь вечную
наследовал еси.

Слава, и ныне, Богородичен:
К Заступнице страны наша Приснодеве
Богородице притецем, / и к первописанней
иконе Ея ныне припадем, / с верою зовуще из
глубины души: / о Мати Божия, спаси землю

Русскую, / исцели сокрушение Ея и верных людей утеш.

Песнь 4.

Ирмос: Ты моя крепость, Господи:

Виждь враги моя, яко умножишася и туне возненавидеша мя, / сохрани душу мою и избави мя, / яко Тебе ради претерпех поношение, / — вопиял еси псаломски, Агафангеле крепкодушне, — / и прославлю силу Твою, Человеколюбче.

Исповедал еси Господа пред отступники и гонители: / с нами Бог, разумеите и покаряйтесь: / страха вашего не убоимся, ниже смутимся. / Господа Бога нашего, Того освятим, и Той будет нам в страх.

Имене Своего ради посреде скорби сохрани тя Господь, / темже в роды родов мышцу Его возвещаеши: / яко аще не Господь помог бы нам, не помянулося бы имя Руси ктому, / ныне же силу Его воспеваем.

Богородичен: Доброту Иаковлю, / красную Тя, Всечистая, Едину обрет от века / Пребезначальное Слово, / и вселився в Тя, обнови человеческое естество, / Егоже моли от всякия мне избавитися скорби.

Песнь 5.

Ирмос: Яко Бога иного:

Осиротевше от паствы твоея лицом, а не
сердцем, / за дело Христово даже до смерти
приблизился еси, / исповедуя Господа
Человеколюбца.

Кую измену даст человек за душу свою? /
евангельски поучался еси, / темже не зайде
солнце исповедания твоего / Света
незаходимаго Господа Человеколюбца.

О всякой скорби Бог утешаше тя, / да
возможеш утешати сущия в скорбех, / еще же
и гонящия благословляти, / воспевая
Страстоположника Господа Человеколюбца.

Богородичен: Направи мя к покаянию, / твердь
умная, Солнце правды нам возсиявшая, / яко да
увиджу свет спасения, Владычице Чистая.

Песнь 6.

Ирмос: Иону в ките:

Царюющая, святителю Агафангеле, / смириша
во оковах нозе твои, / обаче Слово Божие
связати не возмогоша.

Аще благая прияхом от руки Господни, злая ли
не стерпим, / да яко сыновне наказание
приимем, / тако учаше, священнейший отче.
Темже убо благоволим / во изгнаниих, в
теснотах по Христе, / егда бо немощствуем,

тогда о Господе сильни есмы, / глагола еси,
Богомудре.

Богородичен: Освяти ум мой и просвети сердце
мое, / Святая Мати Божия, / и одержащих мя
зол измени, / христиан Заступнице.

Кондак, глас 4:

Исполняя во плоти твоей лишение скорбей / за
Тело Христово, еже есть Церковь, / старейший
быв, страждущим Ея чадам послужил еси, /
предания церковная попирающия обличив и
далече отгнав, / милостию и смирением,
миротворением и мудростию / на свещнице
архиерейском возсиял еси, / мощи своя граду
Ярославлю во утверждение даровав, /
святителю Агафангеле, отче наш.

Икос:

К Церкви и земли Русской любовью распалаяся,
/ неверие и зловерие со дерзновением обличал
еси, / повиноватися и покарятися законным
пастырем чада церковная поучая, / и преизлиха
имети их в любви за дело их. / Темже,
страдания по Христе волею вземшу на рамо, /
злокозненный враг неволью плещи ти даде, / и
ныне, во веки веселяся за лета, в няже видяше
злая, / поминай любовь чтущих тя, святителю
Агафангеле, отче наш.

Песнь 7.

Ирмос: Божия снисхождения:

Имуще щит веры православныя, / стрелы
разженныя мучителей отражал еси, вопия: / аще
бо паки возможете и паки побеждени будете, /
аз же благословлю Бога отец наших.

Со беззаконными вменився, / путем нечестивых
никогдаже идый, / и ненавидим Господа ради
был еси, / обаче не опали малодушие сердце
твое, / горящее любовью к Богу отец наших.

Паче силы гонители отяготиша тя, / обаче сам в
себе осуждение смерти имел еси, / исповедуя
Христа, возставляющаго мертвыя, / темже от
вечныя смерти избави тя Бог отец наших.

Богородичен: Агнца зрящи воздвизаема на
древе неправедне, / многопетая Агница
плачуци восклицаше, матерски слезяще, / и
долготерпение пояше, славяще Сына Своего и
Бога отец наших.

Песнь 8.

Ирмос: Нечестия органы:

Силою многою благовествовал еси, / приемше от
Господа глаголы: / се, удаляющий себе от Тебе
погибнут, / да исповедятся Тебе, Боже, людие
Русстии во веки.

Едем узилище соделав, / реку Божественных
учений оттуду источил еси, / нечестие потопляя

и лице земли Русския напаяя во веки.
Написуя верным благочестивно разум
Божественный, / Святаго Духа явился еси
трьсть, / Емуже со Отцем и Сыном
исповедаешися во веки.

Богородичен: Безсмертнаго Бога рождшая, /
течение смертное укротила еси, / темже
умертви, Чистая, страсти телеси моего, / да Тя
славлю во веки.

Песнь 9.

Ирмос: Благословен Господь Бог:

Узы твоя поминающия / и любовь чутущия
память твою, / вечных и нерешимых уз
избавити молися Христу, / святителю
Агафангеле, / яко ходатай теплый чад Церкви
Русския.

Дар освященный народу Русскому / свыше
послан бысть, святе Агафангеле, / в годину
лютую аки адамант в вере православней его
утверждающий, / и ныне помяни благословящия
о тебе Господа.

Единого Бога возлюбив, / священное служение
исповеданием запечатлел еси, / и яко клас
зрелый земли Русския, / в Небесных житницах
упокоился еси, славне Агафангеле.

Богородичен: Тя верою поющия просвети,
Всенепорочная, / просветительными молниями

Сына Божия, / из Твоея прошедшаго утробы, /
и тьмы нас несветимыя изми Твоим
предстательством.

Светилен:

Представил еси себе жертву живу Богови, /
святу, благоутодну, / в словеснем служении и
исповедании, / святителю Агафангеле, / и тако
просветися свет твой на Святой Руси, / яко
славит выну о тебе Отца Небеснаго.

Слава, и ныне, Богородичен:

Свет от Света миру рождшая, Пречистая, /
светлости святых сподоби люди земли Русския,
Тебе почитающия, / и благодарение от души
приносящия Тебе: / не забуди рабов Твоих,
Едина Благословенная.

На хвалитех стихиры, глас 4:

Досточудне святителю Агафангеле, / ты в
годину гонений на Церковь Русскую / столп
православия исповеданием Христа явился еси, /
узами и изгнанием яко злато в горниле
искушаем, / и в мире почив, благоугоханием от
святых мощей твоих верныя возвеселил еси, //
ныне же во хвалении Бога величаеши. (Дважды).
Егда безбожие сокруши землю Русскую, /
премножество силы Божия проповедал еси,
Агафангеле всехвальне, / гоним, но не

оставляем, / низлагаем, но не погибающе, / в терпении мнозе, бдениих и пощениих, / во благости, любви нелицемерней и словеси истины, // утверждение на Руси Бога нашего восхваляюще.

По слову Господню врази твоя любил еси, / образ страждущим верным людем Русским являя, / святителю Агафангеле, / кленущия тя благословляше, / добро творя ненавидящим тя / и моляся за напасти творящих и изгоняющих, / яко да всыновления сподобишися Отцу Небесному, // Егоже ныне во славе восхваляеши.

Слава, глас 8:

Святителю и исповедниче Христов Агафангеле, / ты первее Ярославскую паству / от омофора святителя Тихона прияв, / примите мя в любовь свою, якоже онаго, / людем глагола еси, / последи же заветом Первостоятеля, / попечение о Церкви Русской подъял еси, / и тому во время гонений безбожных спострадал еси, / и ныне купно с Ним Престолу Божию предстоиши, // моляся о душах наших.

И ныне, Богородичен:

Срадуются с нами умная вся чиноначалия, / духовному совокуплыпе чувственный лик, / видяще Царицу и Владычицу всех, / многоименне верными славиму: / радуются же и

дуси праведных, сущии зрителие видения, / на
воздусе молебнo простирающу всечестней Своей
руце, / просяще умирения миру / и земли
Русской утверждения // и спасения душам
нашим.

Славословие великое и отпуст.

НА ЛИТУРГИИ

Блаженны от канона, песни 3-я и 6-я.

Прокимен, глас 7: Изведи из темницы душу мою
/ исповедатися имени Твоему. (Пс.141:8).

Стих: Гласом моим ко Господу воззвах. (Пс.
141:1)

Апостол к Евреом, зачало 334.

Аллилуиа, глас 2: Праведнии исповедатся имени
Твоему и вселятся правии с лицем
Твоим. (Пс.139:14)

Стих: Господи, Господи, сило спасения моего,
осенил еси над главою моею в день брани. (Пс.
139:8)

Евангелие от Матфеа, зачало 38.

Причастен: Пойте Господеви благоуханныи Его и
исповедайте память святыни Его. (Пс. 29:5)

